

PASUKAN KADET BERUNIFORM LABUAN JUARA KESELURUHAN : Orienteering Kadet Pasukan Badan Beruniform Peringkat Kebangsaan 2019



Labuan, 19 Nov – Pasukan Kadet Beruniform Wilayah Persekutuan Labuan dinobatkan sebagai Juara Keseluruhan Orienteering Kadet Pasukan Badan Beruniform Peringkat Kebangsaan 2019 yang telah berlangsung pada 16hb November sehingga 18hb November melibatkan destinasi program di tempat-tempat menarik di Labuan.

Lokasi utama pelaksanaan program meliputi seluruh Pulau Labuan dan Pulau Papan melibatkan 100 orang peserta dari negeri-negeri seluruh Malaysia, walau bagaimanapun Terengganu dan Pulau Pinang tidak dapat menghantar peserta ke program ini.

Program seumpama 'Amazing Race' ini berjaya menarik peserta mengunjungi tempat-tempat menarik di Labuan, antaranya Memorial War, Muzium Labuan, Muzium Chimney,

Kompleks Sukan Air, Kampung Sungai Bedaun, Surrender Point, Taman Damai Layang-Layang, Pantai Pancur Hitam, Taman Burung, Taman Botanical dan Pulau Papan.

Dalam memberi peluang mendekati budaya dan sejarah setempat, para peserta berpeluang menumpang ambuyat, membungkus kelupis dengan masyarakat kampung Sungai Bedaun dan menerokai keindahan pulau Labuan, berjalan kaki melalui Chimney Trail yang penuh dengan warisan sejarah serta berkayak ke Pulau Papan.



Aktiviti menerokai keindahan pulau di sepanjang pantai



Para peserta seronok dan ceria sepanjang aktiviti berlangsung



Aktiviti swafoto setelah selesai melaksanakan tugas yang diberikan

Para peserta telah diintegrasikan dari pelbagai negeri agar dapat bergaul mesra, berkenal-kenalan seterusnya menimbulkan rasa hormat-menghormati, tanggungjawab, kasih sayang dan kegembiraan dalam kalangan mereka.

Program anjuran Bahagian Kokurikulum dan Kesenian (BKK), Kementerian Pendidikan Wilayah Persekutuan ini telah dikelolakan sepenuhnya oleh Jabatan Pendidikan Wilayah Persekutuan Labuan.

Ketua Penolong Pengarah Kanan, yang hadir sebagai wakil rasmi Pengarah BKK, Tuan Haji Mohd Rashid Mean menyifatkan program orienteering ini telah berjaya memberi pengalaman di luar bilik darjah sebagai pelengkap kepada kandungan pembelajaran di dalam bilik darjah.

Acara perasmian penutupan telah disempurnakan oleh Pengarah Pendidikan Wilayah Persekutuan Labuan, Encik Raisin bin Saidin.

Dalam ucapannya beliau telah memuji peranan guru yang bersungguh-sungguh mengangkat martabat dan harga diri murid melalui program-program di luar bilik darjah yang memberi pengalaman berinteraksi dengan alam.

Beliau turut menyeru semua peserta dari luar Labuan mengambil peluang meneroka keindahan Labuan sebagai sebuah pulau bebas cukai yang kaya dengan sejarah.

“Setiap anak murid perlu ditetapkan KPI tertentu dalam pelibatan dalam aktiviti kokurikulum untuk memberi ruang pengembangan potensi optimum melangkaui aspek akademik semata-mata” Encik Raisin Saidin

Menurutnya lagi, para peserta seharusnya dapat merasai kesan yang mendalam selepas melalui program ini dan diterjemahkan di dalam bentuk perubahan tingkah laku positif di dalam diri masing-masing.



Encik Raisin Saidin merakamkan gambar kenangan bersama kontinjen Selangor Darul Ehsan



Encik Raisin Saidin menyampaikan sijil dan hadiah kepada salah seorang pemenang

Program ini telah mendapat bantuan dan komitmen yang tinggi dari 21 agensi di Wilayah Persekutuan Labuan dengan kepakaran masing-masing.

Pasukan Kadet Beruniform W.P. Labuan telah dinobatkan sebagai juara keseluruhan dengan menjuarai 3 kategori aktiviti berbentuk pertandingan antara negeri.

Pasukan W.P. Labuan telah berjaya menjadi johan dalam pertandingan ikatan seraya dan serong, simpulan tali temali dan video pendek 1 minit. Pasukan Selangor pula mendapat tempat kedua keseluruhan manakala Pasukan Johor di tempat ketiga.

Pengurus Program, Encik Mohd Aminuddin Abdul Malek turut merakamkan setinggi-tinggi penghargaan, terima kasih atas kerja berpasukan dan kerjasama yang telah diberikan oleh semua pihak dalam menjayakan program yang julung-julung kali dianjurkan ini.

Turut hadir dalam majlis penutupan ialah DSP Mohd Firdaus bin Ramli daripada IPK Polis Labuan, Encik Muhammad Nazly Ho bin Abdullah, Pengarah Jabatan Muzium Labuan dan Encik Asbola Amit, Timbalan Pengarah Pembangunan Murid, Jabatan Pendidikan W.P.Labuan.

Berita Bersama : Encik Mohd Nizam bin Yasim



Encik Mohd Aminuddin (dua dari kanan) menyambut ketibaan pasukan dari negeri Kedah

Amanat Akhir Tahun Pengarah Pendidikan dan Malam Penghargaan Jabatan Pendidikan W.P. Labuan



Labuan, 18 Nov – “Jadilah guru yang keberadaannya amat dirasai, ketiadaannya amat dirindui”, demikian amanat akhir tahun Pengarah Pendidikan Wilayah Persekutuan Labuan Encik Raisin Saidin yang berlangsung di salah sebuah hotel di Labuan, semalam.

Peningkatan Kualiti Sekolah dan Kemenjadian Murid akan terus menjadi fokus Jabatan Pendidikan Wilayah Persekutuan Labuan tahun 2020 selaras dengan Pelan Pembangunan Pendidikan Malaysia (PPPM) 2013-2025.

Justeru, Encik Raisin Saidin berkata tugas yang diberikan adalah amanah dan tanggungjawab besar yang perlu dihayati oleh semua pemimpin di pelbagai peringkat terutama guru-guru kerana guru inilah sebenarnya yang berada di barisan paling hadapan bersama murid di bilik darjah, dalam merealisasikan PPPM 2013-2025.

Menyentuh pelibatan dan pencapaian anak-anak murid di Labuan yang terlibat dalam sukan, kokurikulum dan ko akademik sepanjang tahun 2019, Encik Raisin Saidin menyatakan sejumlah **4272 murid mengambil bahagian dalam peringkat negeri, 554 murid di peringkat kebangsaan dan 160 murid di peringkat antarabangsa.**

Beliau berkata lagi, 10 Sektor di Jabatan Pendidikan Wilayah Persekutuan Labuan telah melaksanakan 572 aktiviti seperti dalam perancangan tahunan 2019.

Catatan sebanyak 1758 bilangan pengunjung yang datang ke Labuan bagi tujuan pelancongan dalam pendidikan sedikit sebanyak membantu industri pelancongan di pulau ini.



Encik Raisin Saidin menyantuni Pengetua dan Guru Besar Labuan

Penstrukturan semula Kementerian Pendidikan Malaysia, Jabatan Pendidikan Negeri dan Pejabat Pendidikan Daerah telah dilaksanakan termasuk di Labuan bagi memenuhi keperluan Transformasi Sekolah 2025 (TS25) iaitu untuk memperkasakan kepimpinan dan pengurusan di setiap peringkat.

Sementara itu, mantan Pengetua SMK Ranche-Ranche, Encik Omar Baki Matusin yang mewakili pesara pendidikan melahirkan rasa syukur, terima kasih di atas penghargaan yang diberikan dan berharap agar Jabatan Pendidikan Wilayah Persekutuan Labuan akan terus maju di masa mendatang.

Di Majlis yang sama, guru SM St Anne, Cikgu Lim Swee Hong

dianugerahkan **Guru Sepanjang Zaman** bagi menghargai pengorbanan beliau selama 35 tahun dalam dunia pendidikan.

Encik Raisin Saidin turut memberi Anugerah Khas Pengarah Pendidikan Wilayah Persekutuan Labuan kepada Pengetua SM St Anthony, Puan Dona Undoh, Pengetua SMK Labuan, Encik Ismail Abdullah, Pengetua SMK Lajau, Encik Mohd Jamatin bin Abd Latip, Guru Besar SK Pekan Dua, Puan Hjh Dayang Damit @ Saidah bt Mohd Yassin, Guru Besar SK Sungai Bedaun, Puan Dg Sarifah bt A.Mahmod dan Puan Pan Yii Ying, Guru Besar SJK(C) Chi Wen.



Encik Raisin Saidin menyampaikan plak penghargaan kepada Cikgu Lim Swee Hong diperhatikan oleh Puan Cornelea



Encik Jamatin



Puan Pan Yii Ying



■ Puan Dg. Sarifah



■ Puan Hjh Dayang



Encik Ismail



■ Puan Dona

Setinggi penghargaan dan terima kasih kepada warga pendidikan yang telah bersara dan berpindah jabatan tahun ini di atas sumbangan dan bakti yang dicurahkan sepanjang berkhidmat di Jabatan Pendidikan Wilayah Persekutuan Labuan.

Begitu juga peranan media di Labuan yang banyak membantu dalam mempromosi dan membuat hebahan mengenai pendidikan di Labuan.

Majlis Amanat Akhir Tahun diserikan dengan kehadiran 150 orang terdiri daripada Pengarah Pendidikan, Timbalan-Timbalan Pengarah, Ketua-Ketua Penolong Pengarah,

Kaunselor Negeri, para Pengetua dan Guru Besar, guru-guru, Anggota Kumpulan Pelaksana (AKP), warga pendidikan yang telah bersara dan berpindah jabatan, para jemputan media serta murid-murid yang membuat persembahan.

Puan Cornelea Grace Gordon, Ketua Penolong Pengarah, Sektor Infrastruktur dan Pembangunan, merangkap Pengurus Majlis tersebut mengucapkan ribuan terima kasih kepada semua ahli jawatankuasa yang terlibat menjayakan program ini.

“Labuan Superb! Guru Sayang Muridnya”

Fotografi Oleh : **Mr. Jeevareani A/L Samikanu**







Encik Raisin Saidin bersama warga pendidikan yang menyambut hari lahir pada bulan November



Encik Raisin Saidin bersama staf Jabatan Pendidikan Wilayah Persekutuan Labuan

Pemimpin Sekolah Di Labuan Hadiri Kursus Pengurusan Siri II Anjuran Institut Aminuddin Baki



Labuan – Seramai 48 *School Leader Team (SLT)* yang terdiri daripada Pengetua, Guru Besar dan guru-guru penolong kanan sekolah rendah dan sekolah menengah di sekitar Wilayah Persekutuan Labuan menghadiri Kursus Pengurusan Perubahan Siri II pada 14 hingga 16 November di Bilik Benua, Sektor Sumber Teknologi Pendidikan (SSTP).

Kursus tiga hari ini diselenggarakan oleh Unit Pengurusan Bakat, Sektor Sumber Manusia dengan kerjasama Sektor Perancangan, Jabatan Pendidikan Wilayah Persekutuan Labuan (JPWPL). Dua orang penceramah daripada Institut Aminuddin Baki (IAB) Bandar Instek iaitu Encik Shamsuri Bin Jamil, Ketua Jabatan, Pusat Konsultasi dan Pembangunan Organisasi Pendidikan dan encik Ahmad Termizi, Pensyarah Kanan di jabatan yang sama mengendalikan sesi kursus tersebut .

Dalam kursus tersebut peserta telah didedahkan tentang Pengurusan Altruistik, penyelesaian masalah dan membuat keputusan, penambahbaikan sekolah dan mengurus perubahan. Sesi ceramah yang santai dan penuh ilmiah menarik perhatian peserta yang sentiasa fokus dan aktif merespon setiap pertanyaan. Malah para peserta turut berkongsi ide dalam suasana penuh ceria.



Peserta begitu tekun mendengar penerangan daripada Encik Ahmad Tarmizi untuk aktiviti berkumpulan.



Sesi "Pecah Ais" yang di kendalikan oleh Encik Shamsuri

menarik perhatian peserta

Kursus Pengurusan Perubahan bertujuan membangunkan kapasiti pemimpin secara holistik meliputi Kompetensi diri, komitmen dan perwatakan pemimpin dalam menyediakan pemimpin sekolah yang mampu menangani perubahan.

Menurut Encik Shamsuri, pembangunan kapasiti pemimpin pendidikan yang bercirikan keperluan pendidikan watan amat penting dalam usaha memastikan kemenjadian murid berdasarkan acuan sendiri yang mampu bersaing pada peringkat global. Justeru, pemimpin sekolah perlu sedar mengenai cabaran yang dihadapi termasuk meningkatkan kualiti kepimpinan masing-masing.

“Setiap pemimpin pendidikan perlu memiliki kefahaman mendalam dan pandangan jauh terhadap apa-apa perubahan dalam sistem pendidikan bagi memastikan mereka tidak ketinggalan dalam arus globalisasi,” katanya semasa sesi ceramah.

Dalam Kursus ini, peserta turut didedahkan dengan perancangan strategik iaitu cara mengenalpasti isu yang terdapat di sekolah berdasarkan laporan SKPMg2, merancang pelan strategik dan proses pembangunan strategik yang telah disampaikan oleh encik Ahmad Tarmizi. Diharapkan kursus ini memberi impak positif kepada semua pemimpin pendidikan dan menjadi wadah ke arah memperkasakan kepimpinan berkualiti dan futuristik bagi mencapai aspirasi murid secara global.

Berita Oleh : Puan Kamariah, Sektor Perancangan



Puan Kamariah menyampaikan sijil penghargaan kepada Encik Shamsuri semasa majlis penutupan kursus.

**Pertandingan Keyboard Music
Time Peringkat Kebangsaan
Zon Malaysia Timur Tahun
2019 : Julung Kali Diadakan
Di Labuan**



Labuan, 14 Nov – Jabatan Pendidikan W.P Labuan buat julung kalinya telah diberikan kepercayaan untuk mengelolakan Pertandingan Keyboard Music Time Sekolah-Sekolah Rendah Peringkat Kebangsaan Zon Malaysia Timur Tahun 2019 melibatkan negeri Sabah, Sarawak dan Wilayah Persekutuan Labuan dengan kerjasama Financial Park (Labuan) Sdn. Bhd.

Program yang dianjurkan oleh Yamaha Music Malaysia Sdn Bhd dengan kerjasama Bahagian Sukan, Kokurikulum dan Kesenian (BSKK), Kementerian Pendidikan Malaysia dan Jabatan Pendidikan W.P Labuan telah berlangsung dengan jayanya di Dewan Konvensyen, Kompleks Ujana Kewangan WP Labuan, kelmarin.

Matlamat program ini bertujuan untuk menanam minat murid dari pelbagai latar belakang dan kaum untuk menguasai kemahiran muzik, di samping sebagai aktiviti menyokong dalam melaksanakan perpaduan di dalam kesenian muzik.

Pertandingan dibahagikan kepada murid sekolah rendah, kategori tahap 1 dan tahap 2, di mana setiap pasukan mestilah berjumlah antara 8 hingga 10 orang bagi setiap kategori.

Majlis telah disempurnakan oleh Encik Raisin Saidin, Pengarah Pendidikan Wilayah Persekutuan Labuan.

Encik Raisin Saidin berkata, kedatangan para peserta, guru, ibu bapa memberi ruang dan peluang kepada murid-murid di sini menyaksikan satu pertandingan muzik yang bukan sahaja berprestij malah pastinya akan menghiburkan sidang hadirin yang hadir menyaksikan pertandingan ini.

Beliau berkata lagi, sistem pendidikan muzik yang komprehensif dalam membangunkan kemahiran dan kecenderungan terhadap muzik melalui aktiviti seperti nyanyian, bermain alat muzik dan mencipta melodi indah yang boleh dibawa ke pentas yang lebih besar seperti bermain dalam orkestra di peringkat antarabangsa.

Encik Raisin Saidin juga menyarankan agar pihak Yamaha Music Malaysia Sdn Bhd mengembangkan lagi penganjuran ini dengan mengadakan Karnival Keyboard Music Time melibatkan negara-negara ASEAN seperti Indonesia dan Vietnam.



Pasukan keyboard SK Sungai Bedaun ceria bersama piala dan

sijil kejuaraan kategori tahap 2

Sementara itu, Pengarah Pengurusan, Yamaha Music Malaysia Sdn Bhd, Mr Satohiro Kondo berkata matlamat utama Yamaha Music ialah menanam kecintaan terhadap muzik dalam jiwa setiap insan. Di Yamaha Music School, pelbagai variasi pembelajaran muzik disediakan untuk semua peringkat umur, bermula seawal dua tahun lagi.

Pertandingan Keyboard Music Time ini telah dimenangi oleh pasukan Wilayah Persekutuan Labuan diwakili SK Pekan Dua dan SK Sungai Bedaun dengan masing masing menjuarai kategori tahap 1 dan 2.

Turut hadir dalam majlis tersebut, Penolong Pengarah Unit Pembangunan dan Kecemerlangan Seni, BSKK KPM, Puan Nor Hapipah nt Hj Md Shah, Timbalan Pengarah, Sektor Pembangunan Murid, Encik Asbola @ Hasbollah bin Amit dan Eksekutif Pemasaran, Financial Park (Labuan) Sdn Bhd, Encik Mohd Siaful bin Jaafar.



Pasukan Keyboard dari negeri Sabah



Pasukan Keyboard dari negeri Sarawak



Dari kiri : Encik Saiful, Mr Satohiro Kondo, Encik Raisin Saidin, Encik Asbolla, Puan Nor Hapipah bersama para juri Fotografi oleh : Jeevareani A/L Samikanu dan Guru SK Sungai Bedaun

Pasukan Inovasi Jabatan Pendidikan W.P. Labuan Meriahkan Pameran Inovasi SK Sangkabok



Jabatan Pendidikan W.P. Labuan telah menerima pelawaan dari SK Sangkubok, Kuala Penyu Sabah untuk menyertai pameran inovasi sempena Program Perkongsian Komuniti Profesional (PLC) Melalui Penciptaan Alat Dan Bahan Inovatif anjuran sekolah tersebut.

Rombongan seramai enam guru dan tiga murid dari Labuan telah diketuai oleh Puan Kamariah binti Haji Salim, Penolong Pengarah Sektor Perancangan.

Menurut Puan Kamariah, penyertaan ini adalah

untuk memeriahkan aktiviti inovasi yang julung-julung kali dilaksanakan oleh sekolah berkenaan. Di samping itu, sekolah-sekolah di W. P. Labuan dapat mengeratkan jalinan dan jaringan dengan sekolah-sekolah di Sabah yang sememangnya telah sedia terjalin.

“Melalui platform sebegini, guru-guru dan murid dapat bertukar-tukar idea inovasi dan mengeratkan hubungan profesional secara lebih efektif. Ia merupakan landasan bagi pembudayaan inovasi di peringkat sekolah.” Puan Kamariah

SMK Mutiara telah menghantar sepasukan pempamer terdiri dari 3 murid dan seorang guru pengiring. Mereka mempamerkan hasil inovasi bertajuk PERJANJIAN HUDAIBIYAH. Inovasi ini telah dihasilkan oleh Panitia Sejarah SMK Mutiara yang diketuai oleh Puan Nurul Sulreza Aida binti Zulkifli berbentuk nyanyian dengan lirik lagu berkaitan kisah perjanjian Hudaibiyah.



Para pelajar SMK Mutiara sedang menerangkan inovasi sejarah kepada para pengunjung. Inovasi ini turut tampil dengan Kata Kunci bagi memudahkan murid-murid mengingat fakta-fakta sejarah perjanjian tersebut.

Menurut Adik Amsyar yang merupakan penyanyi dalam inovasi ini, beliau menyifatkan kaedah menyanyi dengan menggunakan irama lagu kesukaan remaja dapat menarik minat murid kepada isi kandungan mata pelajaran Sejarah. Selain Sejarah, inovasi ini juga sesuai untuk mata pelajaran Pendidikan Islam.

Turut serta membuat pameran ialah dua wakil SK Pantai iaitu Ustaz Shahnun bin Othman dengan inovasi bertajuk Kit Doa Qunut dan Cikgu Norhidayah binti Omar dengan inovasi bertajuk *My Magical Tree Teaching Strategy : Adjective Spinner & Fish Your Catch*.



Ustaz Syahnon Bin Othman sedang menerangkan kit doa Qunut kepada pengunjung.

Selain itu, dua guru dari SKK Sk St. Anne tidak ketinggalan mempertaruhkan inovasi bertajuk Reugo 2.0 dan Little Star. Inovasi ini telah dihasilkan masing-masing oleh cikgu Noorshiela Aida binti Abdullah dan cikgu Hamidah binti Abdullah.

Pameran inovasi ini telah dirasmikan oleh Tuan Haji Muhid Bin Hj Misrin, Pegawai Pendidikan Daerah Kuala Penyu. Dalam ucapannya, beliau mengucapkan terima kasih kepada Jabatan Pendidikan W. P. Labuan kerana telah bersungguh-sungguh memenuhi jemputan SK Sangkubok. Hal ini menunjukkan kerjasama antara agensi dapat dijalinkan melalui pelbagai cara termasuk perkongsian inovasi. Beliau berharap agar kerjasama sebegini dapat ditingkatkan pada masa-masa akan datang.

“Warga pendidik perlu sentiasa kreatif dan inovatif dalam menghasilkan banyak inovasi berimpak tinggi dan bermanfaat kepada murid, sekolah serta dunia pendidikan”. Tuan Haji Muhid

Sementara itu, Guru Besar SK Sangkabok, Cikgu Fadliezan Bin Tingan mengucapkan terima kasih kepada PPD Kuala Penyu, semua pempamer bahan inovasi khususnya daripada JPN Labuan dan ibu bapa atas kesudian hadir dalam program ini.

“Di sebalik kemenjadian murid, warga pendidik memainkan peranan penting dalam menarik minat murid dalam bidang inovasi. Kualiti murid dilihat melalui hasil keberkesanan proses persekolahan secara holistik. Tahniah kepada SMK Mutiara dan SMK Pekan Menumbuk yang berjaya menampilkan murid sebagai innovator.” Beliau turut menyampaikan sijil-sijil penghargaan kepada pempamer-pempamer inovasi yang telah menyertai program kali ini. Cikgu Fadliezan, Guru Besar SK Sangkabok

Berita Oleh : Encik Mohd Nizam Yasim, Pengetua SMK Mutiara



Puan Nurul Hidayah binti Omar menerangkan mengenai “My Magical Tree Teaching Strategy : Adjective Spinner & Fish Your Catch” kepada murid SK Sangkabok.



Tuan Haji Muhid Bin Hj Misrin (kanan di barisan hadapan),

Cikgu Fadliezan Bin Tingan (tengah), Puan Kamariah Binti Salim (kiri) bergambar bersama innovator Labuan.

LICER 2019 : Pendidikan Untuk Kehidupan



Labuan, 4 Nov – Jabatan Pendidikan Wilayah Persekutuan Labuan sekali lagi telah berjaya menganjurkan Labuan International Conference on Educational Research (LICER) pada 1 hingga 2 November 2019 bertempat di Hotel Tiara Labuan.

Majlis Penutupan LICER 2019 yang diperkenalkan sejak tahun 2011 lagi telah dirasmikan oleh Ahli Parlimen Labuan, YB Datuk Rozman bin Datuk Haji Isli.

Datuk Rozman berkata dengan tema “Pendidikan untuk Kehidupan” yang telah dipilih untuk LICER tahun ini,

mencerminkan kepentingan belajar dalam dunia dinamik hari ini dan sebagai persediaan untuk generasi masa hadapan.

Acara antarabangsa seperti LICER akan pasti menjadi pengalaman yang memperkayakan ilmu dan memberi penghargaan kepada semua pembentang dan peserta.



Datuk Rozman (kanan) dan Encik Raisin Saidin (kanan) bersama guru dan murid SK St Anne Seramai 6 orang Penceramah (*Plenary Speakers*) dari negara Australia, Oman, Jepun, Singapura, Brunei dan Malaysia telah dijemput dalam LICER pada kali ini.

Pro Vice-Chancellor dari Universiti Taylor's, Malaysia, Prof, Dr Micheal James Keppel, yang berasal dari Australia telah membentangkan tentang *Future Skills : The Future of Learning and Higher Education*.

Lt. Col Abdullah Said Nasser, Al-Araimi dari Royal Army Muscat City, Oman membentangkan tajuk *Education For Nation Growth, History of Oman*.

Associate Prof. Dr Yuko Uchiyama dan Fumiko Nakamura dari Universiti Toyo, Jepun membentangkan *Healthy Students Need Healthy School*.

Puan Makhfadzah Abu Bakar dan Puan Hanita Abdul Aziz dari Kementerian Pendidikan Singapura membentangkan *21st Century Pedagogy in the Teaching and Learning of Malay Language : Singapore Experience*.



Prof, Dr Micheal James Keppel, Taylor's University



Hadirin yang hadir LICER 2019
Dr. Hj Zulkifli Haji Zakaria, Dekan Fakulti Pendidikan,
Kolej Universiti Perguruan Ugama Seri Begawan

membentangkan tajuk Melestarikan Pendidikan Perguruan dalam Memantapkan Profesionalisme Guru Agama.

Sementara 60 orang pembentang terdiri dari Malaysia dan Negara Brunei Darul Salam telah membentangkan kajian tindakan masing-masing serta 13 orang peserta telah membentangkan kertas kerja melalui pembentangan dalam bengkel inovasi.

Pengarah Pendidikan Wilayah Persekutuan Labuan, Encik Raisin Saidin berharap agar persidangan ini akan menyediakan platform yang kondusif dan penting untuk interaksi yang bermakna bagi semua yang hadir.

“Saya yakin bahawa suasana intelektual dan Pertukaran idea dan pandangan dalam suasana profesional akan memberi manfaat kepada pengamal, penyelidik dan peserta”. Encik Raisin Saidin.

Sementara itu, Timbalan Pengarah, Sektor Perancangan merangkap Pengurus Program, Puan Khaziyati Osman mengucapkan terima kasih kepada semua peserta dan ahli jawatankuasa serta semua pihak yang terlibat di atas sokongan yang berterusan terhadap LICER 2019.



Tetamu terhormat bersama pembentang, peserta dan hadirin



Datuk Rozman dan Dr. Yuko Uchiyama : sokongan padu Universiti Toyo Jepun

Album Gambar LICER 2019 : ([klik sini](#))

Kenaikan Pangkat Merupakan Satu Penghargaan dan Pengiktirafan Kepada Guru dan Anggota Kumpulan Pelaksana



Labuan – Seramai 38 orang warga Jabatan Pendidikan menerima surat Kenaikan pangkat Time-Based Berasaskan Kecemerlangan yang terdiri daripada 18 orang Pegawai Perkhidmatan Pendidikan (PPP) Gred DG41 ke Gred DG44, 8 orang PPP Gred DG34 ke Gred DG38, 3 orang Pembantu Tadbir (P/O) Gred N19 ke N22 dan 7 orang Pembantu Pengurusan Murid Gred N19 ke Gred N22. Di samping itu, 2 orang Pembantu Operasi Gred N11 dinaikkan pangkat ke Gred N14 secara *one off*.

Majlis Penyerahan Surat Kenaikan Pangkat Jabatan Pendidikan Wilayah Persekutuan Labuan telah diadakan pada 29 Oktober 2019 bertempat di Jabatan Pendidikan, WP Labuan, Kompleks Ujana Kewangan.

Sebelum ini kumpulan Pegawai Perkhidmatan Pendidikan Gred DG48 hingga DG54 telah menerima surat kenaikan pangkat mereka yang telah disampaikan oleh YBrs. Tuan Mohamad Azhan bin Md. Amir, Timbalan Ketua Setiausaha (Pengurusan) pada 10 Oktober 2019.

Pengarah Pendidikan Jabatan Pendidikan WP Labuan, Encik Raisin Saidin memaklumkan berikutan penstrukturan semula Jabatan, terdapat perjawatan baharu yang telah diwujudkan

atas gred kenaikan pangkat. Kenaikan pangkat merupakan pengiktirafan terhadap kerja buat sepanjang berkhidmat sebagai penjawat awam.

Beliau mengucapkan syabas dan tahniah kepada para guru serta anggota kumpulan pelaksana yang menerima surat kenaikan pangkat dan berharap ianya menjadi pemangkin semangat untuk meningkatkan prestasi masing-masing.

Beliau menaruh kepercayaan yang tinggi bahawa warga Jabatan Pendidikan Wilayah Persekutuan Labuan di segenap lapisan akan terus bersama-sama berusaha memberikan perkhidmatan berimpak tinggi dengan cemerlang dan berintegriti serta melaksanakan penambahbaikan secara berterusan demi melahirkan modal insan yang berkualiti.

Kepimpinan Pendidikan Futuristik : Kolokium Graduan NPQEL Kali Ke-3 Di Sarawak



Labuan, 24 Okt – Seramai 3 pengetua dan 3 guru besar terpilih menyertai Kolokium Graduan NPQEL 2019 di Kuching, Sarawak yang telah diadakan dari 22 hingga 24 Oktober 2019.

Kolokium tahunan peringkat kebangsaan ini diadakan buat kali ketiga sejak tahun 2017 khusus untuk graduan NPQEL membuat perkongsian amalan-amalan terbaik pengurusan pendidikan di sekolah masing-masing.

Seramai 42 pembentang dari seluruh negara telah membuat perkongsian dalam kolokium kali ini. Ini termasuklah 2 pembentang dari W. P. Labuan yang diwakili oleh Pengetua SMK Ranche-Ranche, Encik Yahya Ahmad Puteh dan Guru Besar SK Tanjung Aru, Puan Faridah Amit.

Sementara itu, Pengetua SMK Mutiara, Encik Mohd Nizam bin Yasim dan pengetua SMK Pantai IBWS, Puan Norazita binti Mohd Nor hadir sebagai peserta. Turut hadir sebagai peserta ialah Encik Mohammad Farihi bin Abdul Halim dan Hajjah Aini binti Haji Salleh masing-masing adalah Guru Besar SK Membedai dan SK Kerupang.

Encik Yahya telah membuat pembentangan bertajuk Amalan

PIBK Melalui Pelaksanaan Senyum 360 darjah. Manakala Puan Faridah pula memilih “Makan Usai-usai Lai : Prinsip KABB” sebagai tajuk pembentangan beliau.

Pembentangan daripada wakil Labuan telah berjaya menarik minat peserta kolokium dengan kehadiran peserta melebihi 50 orang dalam sesi selari sepanjang 2 hari kolokium tersebut.



Puan Faridah



Encik Yahya

Dengan tema “Kepimpinan Pendidikan Futuristik”, kolokium yang dianjurkan oleh Institut Aminuddin Baki, Cawangan Sarawak ini telah dirasmikan oleh Ketua Pengarah Pelajaran Malaysia, Datuk Dr. Amin bin Senin.

Dalam ucapan perasmian, Dr. Amin menekankan peri penting PGB sebagai pemimpin pendidikan di sekolah masing-masing mengupayakan sistem penyampaian bagi menjayakan agenda pendidikan negara. “PGB yang telah mengikuti latihan NPQEL sepatutnya kompeten untuk merealisasikan harapan stakeholder selaras Anjakan ke-5 dalam Pelan Pembangunan Pendidikan Malaysia (PPPM) 2013-2025”, kata beliau.

“Pra syarat kepada pemimpin futuristik ialah meletakkan kepentingan dan masa depan murid-murid di hadapan dalam membuat perancangan dan pelaksanaan sesuatu perkara. Ini termasuklah semasa guru menulis Buku Rekod Mengajar Guru (BRMG) agar memenuhi keperluan murid. PGB perlu memantau penulisan BRMG agar tujuannya memenuhi keperluan profesional bukan keperluan pentadbiran semata-mata”, tambahnya lagi.



Dr Amin Senin

Di samping itu, Dr. Amin turut menyeru agar pelaksanaan

Pendidikan Sivik di sekolah meletakkan aspek non-kognitif di hadapan agar matlamat pembentukan nilai-nilai murni dalam memenuhi keperluan sosial tercapai melalui amalan dan bukan literasi semata-mata.

Dr. Amin juga menyarankan agar setiap PGB sebagai barisan hadapan perlu ada passionate dan go extra miles dalam pengurusan pendidikan.

Kontinjen Labuan diketuai oleh Timbalan Pengarah Pendidikan dari Sektor Perancangan, Puan Khaziyati binti Osman. Turut serta ialah Timbalan Pengarah Pendidikan Sektor Pengurusan Sekolah, Puan Maimoon binti Matnoh dan Penolong Pengarah Sektor Perancangan, Puan Kamariah binti Salim.

Berita Oleh : Encik Mohd Nizam Yasim, Pengetua SMK Mutiara

Edugolf Labuan Masters 2019 : Semarak Bulan Sukan Negara



Labuan 23 Okt – Dalam menyemarakkan sambutan Bulan Sukan Negara peringkat WP Labuan, Jabatan pendidikan WP Labuan tidak ketinggalan dengan menganjurkan Pertandingan Edugolf Labuan Master 2019 pada 20 Oktober 2019.

Kejohanan tersebut diadakan di Labuan Golf Club (LGC) dan telah mendapat penyertaan lebih 100 orang pemain golf dari WP labuan dan Sabah.

Sehari sebelumnya iaitu pada 19 Oktober 2019 juga telah diadakan kejohanan golf untuk pemain golf bawah 18 tahun dan bawah 15 tahun di Labuan Golf Club.

Pengarah Pendidikan Labuan Encik Raisin Saidin yang juga merupakan Presiden Edugolf Labuan berharap semoga kejohanan ini menjadi satu wadah untuk memantapkan perpaduan pelbagai kaum di Labuan.

Kejohanan ini juga satu cara untuk mempromosikan LGC dan LIGC sebagai destinasi bermain golf kepada peminat-peminat golf dari luar labuan.



Encik Idris Mohamad telah dinobatkan sebagai Johan Kategori Gross, manakala Encik Mohamad Shukri Sahari@Andy Johan Kategori Nett.

Bagi kategori wanita telah dimenangi oleh Puan Shirley Poh.

Kategori Medal A, Medal B dan Medal C masing-masing telah dimenangi oleh Encik Bonis Samid, Encik J.Herman Tungin dan Dr. Ramlee Hairum.

Encik Raisin Saidin yang turut serta dalam kejohanan ini, telah muncul sebagai Johan dalam kategori VIP Edugolf Labuan Masters 2019.

Kelab SPBT Pupuk Nilai

Menyayangi Buku Teks Sebagai Sumber Ilmu : SMK TP Bedaun, SJK(C) Chi Wen Dinobat Sebagai Johan



Labuan, 14 Sept – Jabatan Pendidikan WP Labuan telah mengadakan Pertandingan Program Amalan Terbaik Kelab Skim Pinjaman Buku Teks (SPBT) Sekolah Peringkat Wilayah Persekutuan Labuan bagi Tahun 2019, yang berlangsung selama 2 hari bermula 10hb Okt bertempat di BTPN Labuan.

Program amalan terbaik ini dilaksanakan bagi mengupayakan peranan Kelab SPBT iaitu membantu dalam pengurusan dan pelaksanaan Skim Pinjaman Buku Teks di sekolah terutama dalam menghasilkan lebih banyak inovasi SPBT.

Dalam menyuntik semangat kerjasama dan tanggungjawab dalam kalangan murid, maka pelaksanaan program ini merupakan satu langkah untuk melahirkan murid sebagai *role model* kepada rakan yang lain.



Encik Raisin Saidin, Puan Jijah, Encik Ag Marten, Encik Hasbollah dan Guru Pembimbing bersama Johan Kelab SPBT SMK Taman Perumahan Bedaun



Johan : Murid-murid dari Kelab SPBT SJK(C) Chi Wen, Guru Pembimbing bersama Encik Raisin Saidin, Encik Ag Marten dan Encik Hasbollah

Majlis perasmian penutupan telah disempurnakan oleh Pengarah Pendidikan Jabatan Pendidikan WP Labuan, Encik Raisin Saidin.

Encik Raisin Saidin berkata, dengan adanya Kelab SPBT di sekolah, kelab ini dapat memupuk nilai menyayangi buku teks dalam kalangan murid dan seterusnya memartabatkan kedudukannya sebagai sumber ilmu yang penting.

Kelab SPBT SMK Taman Perumahan Bedaun telah dinobatkan sebagai Johan Amalan terbaik Kelab SPBT Peringkat Negeri, diikuti oleh Naib Johan, SMK Lajau dan Sekolah Menengah Agama WP Labuan di tempat ketiga.

Manakala Kelab SPBT SJK(C) Chi Wen pula muncul sebagai Johan kategori Sekolah Rendah, Naib Johan SK Bukit Kalam dan Ketiga SK Sungai Bedaun.

Sebanyak 10 sekolah rendah dan 5 sekolah menengah telah mengikuti pertandingan ini yang dihakimi oleh Juri daripada Ketua-ketua Unit SPBT Negeri dan Ketua Juri ialah Cik Siti Hajar Sharudin Sabri, Penolong Pengarah Bahagian Sumber Teknologi Pendidikan, Kementerian Pendidikan Malaysia.



Ucapan Perasmian Penutupan oleh Pengarah Pendidikan Encik Raisin Saidin



Encik Raisin Saidin bersama Guru SPBT SK Bukit Kalam